

Bab 5

Program Pembangunan PKS dan Keusahawanan pada Tahun 2018

Pada tahun 2018, Kerajaan menerusi Kementerian dan agensinya terus terlibat secara aktif dalam mempromosikan pembangunan PKS dengan menjalankan pelbagai program pembangunan PKS. Seperti pada tahun sebelumnya, program tertumpu kepada enam bidang utama, iaitu penerapan teknologi & inovasi, pembangunan modal insan, akses kepada pembiayaan, akses kepada pasaran, infrastruktur serta persekitaran perundangan dan pengawalseliaan. Bidang-bidang utama ini telah dikenalpasti sebagai penggerak pertumbuhan yang penting bagi PKS agar mereka dapat mencapai pertumbuhan yang lebih tinggi dan peralihan daripada PKS yang didorong input kepada PKS yang didorong produktiviti. Dengan memberi penekanan kepada enam bidang utama ini, bukan sahaja usaha mereka tertumpu kepada meningkatkan sumbangan PKS kepada perkembangan ekonomi tetapi juga untuk memastikan pulangan pelaburan yang lebih tinggi bagi peruntukan yang dibelanjakan untuk pembangunan PKS.

Setakat April 2018, sejumlah 158 program pembangunan PKS telah dirancang di bawah pelbagai Kementerian dan agensi dengan komitmen kewangan sebanyak RM14.3 bilion. Program-program ini disasarkan untuk memberi manfaat kepada PKS di semua sektor dengan bilangan penerima yang dijangkakan mencecah hampir 600,000. Jumlah peruntukan belanjawan yang lebih besar yang dilaporkan oleh Kementerian dan agensi untuk PKS tahun ini didorong oleh program baru dan program tambahan dengan peruntukan besar yang dilaporkan di bawah Pelan Tindakan Bersepadu SME (*SME Integrated Plan of Action, SMEIPA*) yang menyenaraikan program-program pembangunan PKS dalam sesuatu tahun.




Jadual 5.1: Program Pembangunan PKS yang Dirancang Mengikut Bidang Tumpuan Setakat April 2018

Bidang Tumpuan	Bilangan Program	Perbelanjaan Kewangan (RM juta)	Penerima Manfaat PKS
Akses kepada Pembiayaan	48	13,482.4	413,236
Pembangunan Modal Insan	42	300.3	136,703
Akses kepada Pasaran	28	128.7	46,679
Penerapan Teknologi dan Inovasi	27	226.1	2,487
Infrastruktur	12	111.5	196
Persekitaran Perundungan dan Pengawalseliaan	1	12.0	-
Jumlah	158	14,261.0	599,301


Pada tahun 2018, Akses kepada Pembiayaan telah diberikan penekanan terbesar dengan jumlah program dan peruntukan yang paling banyak. Sebanyak 48 program (30.4%) telah dirancang dengan peruntukan berjumlah RM13.5 bilion yang merangkumi hampir 95.0% daripada keseluruhan peruntukan. Program-program ini dijangka memberi manfaat kepada lebih daripada 413,000 PKS dalam semua sektor. Bilangan program kedua tertinggi adalah untuk pembangunan modal insan dengan 42 (26.6%), diikuti oleh akses kepada pasaran dengan 28 program (17.7%), penerapan teknologi dan inovasi dengan 27 program (17.1%), infrastruktur dengan 12 program (7.6%) serta satu program di bawah persekitaran perundungan dan pengawalseliaan.

Bab ini akan melaporkan program untuk 2018 dalam semua bidang tumpuan kecuali untuk program pembiayaan kerana ini akan dilaporkan dalam Bab 6 tentang Akses kepada Pembiayaan.

Carta 5.1: Bilangan Program Mengikut Bidang Tumpuan (%)



Carta 5.2: Peruntukan Kewangan Mengikut Bidang Tumpuan (%)



PEMBANGUNAN MODAL INSAN

Tenaga kerja yang mencukupi dan gabungan bakat yang tepat adalah penting bagi memastikan kejayaan mana-mana perniagaan. Dalam usaha untuk meningkatkan keupayaan keusahawanan serta kemahiran pemilik dan pekerja PKS, Kerajaan terus melaksanakan beberapa program pembangunan modal insan. Setakat April 2018, sejumlah 42 program untuk Pembangunan Modal Insan telah dirancang untuk dilaksanakan dengan jumlah peruntukan berjumlah RM300 juta. Program-program ini dijangka memberi manfaat kepada 136,703 PKS. Antara program-program utama yang akan dilaksanakan pada tahun ini termasuklah:

- **Program Peningkatan & Pembangunan INSKEN TERAS (TERAS Enhancement and Development, TED)** oleh Institut Keusahawanan Negara Berhad (INSKEN) merangkumi latihan pembangunan bakat, organisasi dan pengurusan. Program ini menyediakan latihan komprehensif mengenai kemahiran dan pengetahuan perniagaan bagi membolehkan usahawan mengekalkan perniagaan berprestasi tinggi yang mampan khususnya dalam bidang pembangunan bakat dan kepimpinan di samping perniagaan secara am serta perubahan organisasi. Sejumlah RM4.1 juta telah diperuntukkan di bawah program ini untuk melatih 830 usahawan PKS dan pekerja menerusi dua projek utama: *Global Marketing Summit 2018* dan *Program Pembangunan Bakat INSKEN 2018*;
- **Cabarani Perniagaan Luar Bandar (Rural Business Challenge, RBC)** yang sedang dijalankan oleh Bahagian Pembangunan Keusahawanan Desa, Kementerian Pembangunan Luar Bandar dan Wilayah (KPLB) merupakan pertandingan cadangan perniagaan untuk menggalakkan belia untuk memilih keusahawanan sebagai kerjaya dan menubuhkan perniagaan di kawasan luar bandar masing-masing. Geran perniagaan bernilai sehingga RM2 juta akan diberikan kepada mereka yang cadangannya dianggap berpotensi. Program ini juga bertujuan untuk menggalakkan belia untuk menjadi pencipta pekerjaan dan bukan pencari kerja bagi meningkatkan tahap sosioekonomi penduduk luar bandar serta menggalakkan penghijrahan balik melalui penciptaan persekitaran luar bandar yang menarik. Pada tahun 2018, sejumlah RM15 juta telah diperuntukkan di bawah Program ini untuk membantu 20 penerima manfaat;

- **Program Transformasi Bengkel Bumiputera (Bumiputera Workshop Transformation Program, BWTP)** yang diterajui oleh Institut Automotif Malaysia (MAI) untuk memberi sokongan kepada bengkel automotif Bumiputera di seluruh negara untuk meningkatkan tahap kepuasan pelanggan, jualan dan keuntungan. Sebanyak RM3.7 juta telah diperuntukkan di bawah program ini untuk membantu 1,000 pemilik bengkel;
- **Sistem Latihan Dual Nasional (National Dual Training System, NDTs)** di bawah Jabatan Pembangunan Kemahiran, Kementerian Sumber Manusia. NDTs berfungsi sebagai saluran untuk menyediakan pekerja terlatih bagi PKS melalui latihan untuk lepasan sekolah atau penganggur serta menjalankan kursus yang meningkatkan kemahiran untuk pekerja baru dan sedia ada. Program ini telah menerima peruntukan RM40 juta untuk membiayai latihan bagi 6,400 pelatih;
- **Subkontraktor untuk Program Latihan Pasaran Eksport (Super Bumi)** yang dilaksanakan oleh Lembaga Perindustrian Kayu Malaysia. Program ini bertujuan untuk membangunkan sekumpulan subkontraktor Bumiputera berorientasikan eksport. Peruntukan sebanyak RM2 juta telah disediakan untuk Program ini untuk membantu 50 penerima; dan
- **Latihan untuk Usahawan yang Berpotensi dan Baharu** oleh Perbadanan Pembangunan Ekonomi Sabah untuk menyediakan latihan dalam bidang keusahawanan, pengetahuan teknikal dan kemahiran perniagaan. Sejumlah RM300,000 telah diperuntukkan bagi program ini untuk membantu 200 penerima.

AKSES KEPADA PASARAN

Dalam pasaran yang semakin liberal dan global, lebih banyak penekanan perlu diberikan untuk memudahkan akses kepada pasaran dalam dan luar negara bagi PKS. Ini mungkin dapat dicapai antaranya menerusi promosi, penjenamaan atau hubungan perniagaan. Sehubungan dengan itu, sejumlah 28 program untuk meningkatkan akses kepada pasaran bagi PKS telah dirancang pada tahun 2018 dengan peruntukan berjumlah RM128.7 juta untuk memberi manfaat kepada 46,679 PKS.

- **Program Transformasi Produk dan Pengedaran Berkesan** oleh Bahagian Pembangunan Perniagaan, Kementerian Perdagangan Dalam Negeri dan Hal Ehwal Pengguna. Program ini membantu PKS untuk meningkatkan kualiti produk mereka dari segi pembungkusan, jangka hayat dan kriteria lain yang diperlukan untuk memenuhi standard pasar raya dan pasar raya besar di Malaysia. Pada tahun ini, sejumlah RM3.8 juta telah diperuntukkan di bawah Program ini untuk memberi manfaat kepada 50 pengeluar PKS.
- **Pameran Usahawan Bumiputera Sarawak** yang dilaksanakan oleh Kementerian Pembangunan Perindustrian dan Usahawan Sarawak untuk membantu usahawan Bumiputera Sarawak dengan menyediakan peluang perniagaan untuk mengembangkan pasaran mereka. Sejumlah RM500,000 telah diperuntukkan untuk Program ini pada tahun 2018 bagi membantu 150 PKS Bumiputera di Sarawak.
- **Mengukuhkan Pengedar Eksport Berasaskan Agro** oleh Lembaga Pemasaran Pertanian Persekutuan (FAMA). Program ini mempunyai dua objektif, iaitu untuk menyokong pengedar eksport agro-makanan sedia ada dan meningkatkan bilangan pengeksport yang kompetitif dalam pasaran eksport serta mengukuhkan program asas pengeksport bagi mewujudkan pasaran eksport baru. Hampir RM2.0 juta telah diperuntukkan di bawah Program ini untuk memanfaatkan 150 PKS dalam industri agro-makanan.

PENERAPAN INOVASI DAN TEKNOLOGI

Dalam bergerak ke arah menjadi negara berpendapatan tinggi, PKS di Malaysia perlu menerapkan budaya inovasi dan penggunaan teknologi dalam operasi perniagaan mereka. Walau bagaimanapun, PKS sering menghadapi cabaran dalam usaha inovasi dan pengkomersialan mereka kerana kekurangan sokongan bersepadu dan pembiayaan untuk membiayai aktiviti tersebut. Untuk mengatasi masalah ini, Kerajaan terus melaksanakan 27 program pada tahun 2018 dengan peruntukan berjumlah RM226.1 juta. Program-program ini disasarkan untuk memberi manfaat kepada hampir 2,500 penerima dan antara lain termasuk:



- **Business Accelerator Programme (BAP)**, iaitu sebuah program bersepadu yang dijalankan oleh SME Corp. Malaysia dengan matlamat untuk membangun dan memupuk PKS yang dinamik, berdaya saing dan berdaya tahan melalui SCORE dan juga untuk membantu dalam pembinaan kapasiti serta menyediakan sokongan kewangan, nasihat dan teknikal. Sejumlah RM20.0 juta telah diperuntukkan untuk membiayai Program yang dijangka memberi manfaat kepada 100 PKS;
- **Change Upgrade Product (CUP)** yang dijalankan oleh Bahagian Industri Asas Tani, Kementerian Pertanian dan Industri Asas Tani yang memberi tumpuan kepada peningkatan kualiti produk, pembangunan dan keupayaan. Program ini telah medapat peruntukan sebanyak RM3.5 juta untuk membiayai kegiatannya dan telah menetapkan sasaran untuk membantu 200 penerima manfaat;
- **Dana Pemerolehan Teknologi (Technology Acquisition Fund, TAF)** oleh Perbadanan Pembangunan Teknologi Malaysia (MTDC) dengan tujuan untuk menggalakkan penggunaan teknologi asing untuk sektor perkilangan dan pembangunan fizikal produk dan proses sedia ada dan baru. Objektif TAF adalah untuk meningkatkan penjanaankekayaan dan kandungan teknologi syarikat-syarikat Malaysia yang dapat meningkatkan daya saing global mereka. Peruntukan sebanyak RM10.0 juta telah disediakan di bawah Program ini pada tahun 2018; dan
- **NKEA EPP8: Geran Pengkomersialan untuk Pembangunan Produk Makanan dan Berasaskan Kesihatan** oleh Lembaga Minyak Sawit Malaysia (MPOB) yang menggalakkan pengeluaran dan pembangunan produk makanan dan produk berdasarkan kesihatan serta mempercepat pertumbuhan dalam segmen hiliran mereka. Peruntukan sebanyak RM6.0 juta telah disediakan untuk melaksanakan Program ini pada tahun 2018.

INFRASTRUKTUR

Akses kepada infrastruktur yang baik pada kos yang berpatutan masih menjadi salah satu cabaran untuk PKS. Untuk menangani masalah ini, Kerajaan telah merancang untuk melaksanakan 12 program infrastruktur, terutamanya untuk menyediakan kemudahan perniagaan yang sesuai bagi usahawan, sepanjang tahun 2018. Sebanyak RM111.5 juta telah diperuntukkan bagi program-program yang disasarkan untuk memberi manfaat kepada 196 PKS. Program-program yang telah dirancang antara lain termasuk:

- **Program Bengkel Industri Vendor** oleh Lembaga Pembangunan Wilayah Kedah (KEDA) untuk membina tujuh bengkel dan bangunan perindustrian bagi usahawan luar bandar. Program ini mendapat peruntukan sebanyak RM1.0 juta dengan matlamat untuk memberi manfaat kepada 105 usahawan di kawasan ini;
- **Program Pembangunan Estet Perindustrian** yang dijalankan oleh Kementerian Pembangunan Perindustrian dan Usahawan Sarawak (MIED Sarawak) dan berpusat di Taman Perindustrian Sibu. Program ini bertujuan untuk menyediakan kemudahan dan infrastruktur yang lebih baik melalui pembangunan estet perindustrian yang terancang; mewujudkan persekitaran yang lebih kondusif untuk menyokong transformasi komuniti perniagaan tempatan; dan mempromosikan pertumbuhan PKS secara teratur serta mewujudkan lebih banyak aktiviti ekonomi. Peruntukan sebanyak RM7.0 juta disediakan untuk Program ini yang dijadualkan siap pada tahun 2020;
- **Program Pembangunan Kilang Siap Bina Industri Kecil dan Sederhana untuk Bumiputera** di Kawasan Perindustrian Pasir Gudang, yang dilaksanakan oleh Perbadanan Johor dengan matlamat untuk mewujudkan peluang perniagaan untuk PKS di Kawasan Industri Pasir Gudang serta mewujudkan peluang pekerjaan untuk penduduk tempatan. Peruntukan sebanyak RM30.0 juta telah disediakan dan 30 orang penerima manfaat disasarkan untuk mendapat manfaat daripada Program ini; dan
- **Pembangunan Usahawan Desa** oleh Kementerian Pembangunan Luar Bandar Negeri Sabah untuk menyokong usahawan luar bandar dengan menyediakan kemudahan yang sesuai untuk aktiviti perniagaan. Di bawah Program ini, premis perniagaan akan disediakan atau dinaik taraf di pusat usahawan luar bandar, tamu niaga dan pusat pembelajaran masyarakat. Premis ini dilengkapi dengan kemudahan yang diperlukan bagi usahawan untuk memulakan, mengendalikan atau mengembangkan perniagaan mereka. Sejumlah RM1.0 juta telah diperuntukkan di bawah Program ini pada tahun 2018.

PERSEKITARAN PERUNDANGAN DAN PENGAWALSELIAAN

Sistem perundangan dan pengawalseliaan yang mantap adalah penting untuk menyediakan persekitaran yang kondusif bagi PKS untuk berkembang maju. Dalam tahun-tahun kebelakangan ini, PKS menghadapi masalah kenaikan kos untuk menjalankan perniagaan termasuk kos pematuhan untuk pendaftaran perniagaan dan pelesenan.

Bagi meningkatkan kemudahan menjalankan perniagaan bagi PKS, Pelan Induk PKS (2012-2020) telah mencadangkan Program Berimpak Tinggi 1 (HIP 1) bagi penyepadan pendaftaran perniagaan dan pelesenan. Inisiatif ini dilaksanakan menerusi beberapa fasa dan diterajui oleh Unit Pemodenan Tadbiran dan Perancangan Pengurusan Malaysia (MAMPU) dengan usahasama SME Corp. Malaysia, Suruhanjaya Syarikat Malaysia (SSM), Unit Penyelaras Pelaksanaan (ICU JPM), Malaysia Productivity Corporation (MPC) dan kerajaan-kerajaan negeri.

Fasa-fasa pelaksanaan projek ini merangkumi penubuhan gerbang pendaftaran perniagaan & pelesenan (malaysiabiz.mampu.gov.my), penyepadan pendaftaran perniagaan & pelesenan serta pelaksanaan HIP 1 di Sabah dan Sarawak.

